



世界書局印行

景印
藻堂

四庫全書薈要

集
第一二四部
總集類





本冊目次

書名及撰人	卷次	頁次
漢魏六朝百三家集一百十八卷（其中有上中下者以一卷計實爲一百二十四卷）明張溥編	卷七十七至卷九十五	四七一—一

欽定四庫全書薈要

集部
漢魏六朝百三家集卷七十七

詳校官候選知縣臣吳甸華

欽定四庫全書薈要卷一萬九千六百六十六集部

漢魏六朝百三家集卷七十七

明 張溥 輯

謝朓集

賦

酬德賦 有序

右衛沈侯以冠世偉才眷予以國士以建武二年予將南牧見贈五言予時病既以不堪蒞職又不獲復詩四

欽定四庫全書

漢魏六朝百三家集
卷七十七

年予忝役朱方又致一首迫東偏冠亂良無暇日其夏還京師且事讌言未遑篇章之思沈侯之麗藻天逸固難以報章且欲申之賦頌得盡其體物之旨詩不云乎無言不酬無德不報言既未敢為酬然所報者寡于德耳故稱之酬德賦其辭曰

嗟夫四游之代序六龍驚而不息輕蓋靡于駿奔玉衡勞于拊翼嗟歲晏之渺歡曾陰默以悽惻元武伏於重介宛虹潛以自匿覽斯物之用舍相羣方之動植弔

悴軀於華省理衣簪而自敕思披文而信道散忿懣於
胸臆嗟民生之知用知莫深於知己彼知己之為深信
懷之其何已牽弱葛之蔓延寄陵風於松杞指曲蓬之
直達固有憑於原泉彼排虛與蹠實又相鳴於林止興
伐木於爻生詠承筐於君子矧景行之在斯方寄言於
同恥求相仁於積習寓神心于名理惟敦牂之旅歲實
興齊之二六奉武運之方昌觀休風之未淑龍樓儼而
洞開梁邸煥其重複君奉筆於帝儲我曳裾於皇穆藉

風雲之化景申遊好於蘭菊結德言而為佩帶芳猷而
為服援雅範以自綏懿前修之所勗昔仲宣之發穎實
中郎之倒屣及士衡之籍甚托壯武之高義有杞梓之
貞心協丹采之輝被伊吾人之陋薄雖黼藻之何寘惟
風雅之未變知雲網之不廓譬層棟之將傾必華榱之
先落翳明離以上賓屬傳體於纖萼周二輝而分崩擠
九鼎於重壑雖魚鳥之欲安駭風川而迴薄微天道之
布新嗟員首其焉託子寔迹以多媿塊離尤而獨處君

紆組於名邦貽話言於川渚悵分手於東津望徂舟而
延佇慮古今之為隔豈山川之云阻賴先德之龍興奉
英靈之電舉事紫泥之密勿腰青綬而容與沾後惠以
竭來竟卒獲其笑語我艤舟以命徒將泊徂於南夏既
昂予以炯戒又引之以風雅若笙簧之在聽雖舒憂而
可假昔疢病於漳濱思繼歌而莫寫思靈降之未已奉
京粉而作傳臨邦途之永陌懷子馬於騏驎望平津而
出宿登崇岡而興賦顧歸憶之南迴引行鑣而東驅何

瓊才之博侈申贈辭於萱樹指代匠而切偲比治素而
引喻方含毫而報章迫紛埃之東駕釋末位以言歸忽
乘驛以南赴連篇章之莫訓欲寄言於往句類鐵駟之
難矯似洞源之不注意搔搔以抒軸魂營營而馳騫爾
腰戟於戎禁我拂劍於郎闈願同車以日夜城望昏而
掩扉時遊盤以未極睽落景之徂輝苦清顏之倏忽恹
歡賞之多違排重闕而休告知南館之有依驂職門以
右轉僕望路其如歸忘清漏之不緩惜曉露之方晞聞

夫君之東守地隱蓄而懷僊登金華以問道得石室之
名篇悟寰中之迫脅欲輕舉而舍旃離寵辱於毀譽去
天伐於腥膻忽攜手以上征躋中皇之修迴巾帝車之
廣軾掉河舟之輕艇歷星術之熠燿浮天潢之澠溟機
九轉於玉漿練七明於神鼎吹萬化而不喧度千春之
可並齊天地於倏忽安事人間之紆綈哉

思歸賦 有序

夫鑒之積也無厚而納窮神之照心之徑也有域而懷
重淵之深余少而薄遊身缺防方思俄然萬里晚而自
省諒非一塗

余菲薄以固陋受靈恩而不訾拖銀黃之沃若剖金符
之陸離舟未濟而河廣途方遙而馬疲忽中寢而念厲
魂申旦而九移昔受教於君子逢知己之隆盼被名立
之羽儀沾官成之藻綯羌服義而不怠豈臨歧而喻變
勢方迅於轉圓理好旋於奔電援弱莒而能升踐重岡
而不眩信禔福之非已寧悔禍其如見大明廓以高臨

吹萬忻而同悅跨神臯之沃衍奉英藩之睿哲承比屋
之隆化踵芳塵之餘烈懷齷齪之褊心無夸毗之誕節
竟伊鬱而不怡賴遐討於先哲紛吾生之遊蕩彌一紀
而歷茲自下車於江海涉青春於是時睠崇岡而引領
望大厦而長思雖曲街之委陋猶寤寐而見之況神交
而通夢眇河漢於佳期爾乃眷言薄暮南眺悠然方整
歸轡願受一廛考華城之直陌相洛浦之迴阡連飛甍
於故爰接閒館以懷僊臨南塲以藝藿寄北地而采蓮
睇微英之霍霍望水葉之田田乃翦山木不日為功非
輪非奐去斲去礱夜索綯而繞繞旦乘屋而芄芄竹櫺
崎嶇而經北繩閑窈窕以臨東布茵蕭於疎櫺織葦亂
於迴攏于是籬揮芳槿門拂長楊園桃春發窗竹夏涼
晨露晞而草馥微風起而樹香無芳菲以襲予空旖旎
於都房恒離居以歲月庸銷落而徒傷我聞時命有殖
無遷徵事或在求理未甄譬豐草之區別隨霜露而天
延背萱鮮於堂北尚幽幽而未捐苟外物以能惑亦在

應而無騫况朝霞之采可嚙瓊扉之飾方宣養以虛白
之氣悟以無生之篇豈加璧之贈可動執珪之位能纏
歸來薄暮聊以永年

遊後園賦

積芳兮選木幽蘭兮翠竹上蕪蕪兮蔭景下田田兮被
谷左蕙畹兮彌望右芝原兮寫目山霞起而削成水積
明以經復於是敞風閨之藹藹聳雲館之迢迢周步檐
以升降對玉堂之沏寥追夏德之方暮望秋清之始飈

欽定四庫全書

漢魏六朝百三家集
卷七十七

六

藉宴私而遊衍時寤語而逍遙爾乃日棲榆柳霞照夕
陽孤蟬已散去鳥成行惠氣湛兮帷殿肅清陰起兮池
館涼陳象設兮以玉璫紛蘭籍兮咀桂漿仰微塵兮美
無度奉英軌兮式如璋藉高文兮清談預含毫兮握芳
則觀海兮為富乃游聖兮知方

臨楚江賦

爰自山南薄暮江潭滔滔積水裊裊霜嵐憂與憂兮竟
無際客之行兮歲已嚴爾乃雲沉山岫風動中川馳波

鬱素駭浪浮天明沙宿莽石路相懸於是霧隱行鴈霜
眇虛林迢迢落景萬里生陰列攢筍兮極浦弭蘭鷁兮
江潯奉王鑄之未暮食勝賞之芳音願希光兮秋月庶
永照於遺簪

七夕賦

奉護軍
命作

金祗司矩火曜方流素鍾登御夷律鳴秋朱光既夕涼
雲始浮盈多露之藹藹升明月之悠悠步廣階而延睎
屬天媛之淹留嗟斯靈之淑景招好仇於服箱邁姮娥

欽定四庫全書

漢魏六朝百三家集
卷七十七

七

而擢質凌瑤華而擅芳厭白玉以為飾霏丹霞而為裳
迴龍駕之容裔亂鳳筦之淒鏘騰燭光於西極命二妃
於瀟湘軼帝車而捐玦凌天津而上翔悵漢渚之夕漲
忻河廣之既梁臨瑤席而宴語綿含睇而蛾揚嗟蘭夜
之難永泣會促而怨長忌纖阿之方駕吝長庚之末光
撫鳴琴而修恍浩安歌而自傷歌曰清絃愴兮挂觴酬
雲幄靜兮香風浮龍鑣蹀兮玉鸞整睭星河兮不可留
分雙袂之一斷何四氣之可周斯乃嚮像恍惚彷彿幽

暖耳之無聞目之無續故鐘鼓聞而延子隱白日沉而
季後對豈形氣之所求亦理將其如昧君王壯思風飛
冲情雲上顧楚詩而縱轡瞻蘭書而競爽實研精之多
暇聊餘日之駘蕩賦幽靈以去惑排視聽而玄往晒陽
雲於荆夢賦洛篇於陳想乃澄心而閑邪庶綢繆於茲
賞

擬風賦

奉司徒
敎作

起日域而搖落集桂宮而送清開翠帳之影藹響行珮

欽定四庫全書

漢魏六朝百三家集
卷七十七

八

之輕鳴揚淮南之妙舞發齊后之妍聲下鴻池而蓮散
上雀臺而雲生至於新虹明歲高月照秋暉儀乃豫冲
想雲浮鄒馬之賓咸至申穆之醴已酬朝役登樓之詠
夕引小山之謳厭朱耶之沉遂思輕舉而遠遊驕驕之
馬魚躍飄鑒車而水流此乃大王之盛風也若夫子雲
寂寞叔夜高張煙霞潤色荃萸結芳出澗幽而泉列入
山戶而松涼眇神玉於丘壑獨起遠於孤觴斯則幽人
之風也

高松賦

奉竟陵
王敎作

閱品物於幽記訪叢育於秘經巡汜林之彌望識斯松
之最靈提於巖以羣茂臨於水而宗生豈揄抑之比性
指冥椿而等齡若夫修榦垂蔭喬柯飛穎望肅肅而既
閒即微微而方靜懷風陰而送聲當月露而留影既羊
眠於廣隰亦迢遞於孤嶺集九僊之羽儀棲五鳳之光
景固總木之為選貫山川而自永爾乃青春受謝雲物
含明江臯綠草暖然已平紛弱葉而凝照競新藻而抽

欽定四庫全書

漢魏六朝百三家集
卷七十七

九

英陵翠山其如剪施懸蘿而共輕至於星迴窮紀沙鴈
相飛同雲決其無色陽光沉而減暉卷風颭之歛吸積
霰雪之嚴霏豈彫貞於歲暮不受令於霜威若乃體同
器制質兼上才夏書稱其岱畎周篇咏其徂徠乃屈已
以弘用構大壯於雲臺幸為玩於君子留神心而顧懷
君王乃徙譙蘭室解佩明椒寒幽蘭於夕陰詠聳榦於
琴朝陵高丘以致思御風景而逍遙夷黻冕之隆貴懷
汾陽之寂寥邈道勝於千禩蘊神理而自超夫江海之

為大寶涓澮之所歸瞻衡恒之峻極不讓壤於塵微嗟
孤陋之無取幸聞道於清微理弱羽於九萬愧不能分
奮飛

杜若賦

奉隋王教
於坐獻

馮瑤圃而宣游臨水木而延佇柳含色於遠岸泉鏡流
於枉渚蔭綠竹以淹留藉幽蘭而容與覽茲榮之悅茂
紛為芳於清籟觀夫結根擢色發曜垂英綠春巒以纖
布陰涼潭而影清景奕奕以四照枝靡靡而葉傾冒霜
蹊以獨蒨當春郊而逕平寧汀洲以企予懷石泉於幽
情嗟中巖之纖草厠金芝於芳叢夕舒榮於潄露旦發
彩於春風承羲陽之光景庶無悲於轉蓬

野鷺賦

有序

有門人斃一野鷺因以為獻予時命以登俎用待賓客
客有愛其羽毛請予為賦其詞曰

夫何羅人之伎巧薦江海之逸禽落摩天之迅羽絕歸
飛之好音碎文錦之丹臆裂雕綺之翠襟孤雛驚以靡

翼饑雌叫而莫尋越滄流以遠致乃交留以魚金因閭
寺以傳請排邃戶以重深貴敷祗以取愛願登俎以甘
心

表

為百官勸進齊明帝表

臣聞時乘在御必待先天之業神化為皇乃叶應期之
運况復湯孫有緒纂堯惟德舊邦佇新復禹歸社大齊
之權輿寶歷孕育前古昭假四海克酬三靈而嗣命疾
威蕃鄙叛渙委裘御寓契鼎如忽陛下文思體道徇齊
作聖翦應龍於冀州戮長蛇於沮水榮光之瑞昭回延
喜之寶潤色天睭爰發人謀咸贊伏願陛下仰答靈祇
弘宣景命誕受多方奄宅萬國

為明帝讓封宣城公表

如其懸旌灞澹刷馬伊穀灑酒望屬車之塵整笏侍升
平之禮陛下許謨玄覽欽若宏圖鑒臣匪躬共申彛訓
雖量能之請近遂微躬則弘長之風足軌來世

為明帝拜錄尚書表

升降王階拜揚休命六轡在手千里何偕司會天官之
統尚書百僚之本弘之則庶績惟凝替之則彛倫斯敷
修身踐言本慙五美果行育德未階六正安屬負圖之
寄多謝五仁之績操檜楫於龍津荷梓梁於雲構無以
輔位明堂遺像麟閣

章

為宣城公拜章

欽定四庫全書

漢魏六朝百三家集
卷七十七

十三

惟天為大日星度其象謂地益厚河岳宣其氣斯冕旒
所以貞觀衮職所以代終慙下穆而上尊豈南征而北
怨何以克詠九歌載宣七德銘彼旂常勒斯鐘鼎

牋

辭隋王子隆牋

故史文學謝朓死罪死罪即日被尚書召以朓補中軍
新安王記室參軍朓聞潢汙之水願朝宗而每竭駕蹇
之乘希沃若而中疲何則臯壤搖落對之惆悵岐路東

西或以鳴嗚况乃服義徒擁歸志莫從邀若墜雨翩似

秋蒂朓實庸流行能無算屬天地休明山川受納褒采

一介搜揚小善故得捨耒場圃奉筆兔園東亂三江西

浮七澤契濶戎旃從容讌語長裾日曳後乘載脂榮立

府庭恩加顏色沐髮晞陽未測涯涘撫臆論報早誓肌

骨不悟滄溟未運波臣自蕩渤澥方春旅駟先謝清切

藩房寂寥舊輦輕舟反溯弔影獨留白雲在天龍門不

見去德滋永思德滋深惟待青江可望候歸艎於春渚

欽定四庫全書

漢魏六朝百三家集
卷七十七

十三

朱邱方開效蓬心於秋實如其簪履或存社席無改雖
復身填溝壑猶望妻子知歸攬涕告辭悲來橫集不任
犬馬之誠

啟

為王敬則謝會稽太守啟

臣本布衣不謀遠大折衝之勤不舉變理之義何階常
恐覆餗是貽咎徵斯應陛下繼歷聖統日月重光得以
桓珪衣服拜奉歲時視濯獻牲鞠躬郊廟而鴻恩妄假

覆授龜符玉節邁於雙璜表東侔於四履臨邊三事既
謝張溫潁川再撫亦慙黃霸

謝隨王賜左傳啟

昭晰殺青近發中汗恩勸挾策慈最下惟眎未窺山笥
早惜河籍業謝專門說非章句庶得既困而學括羽瑩
其蒙心家藏賜書羸金遺其貽厥披覽神勝吟諷知厚

謝隨王賜紫梨啟

味出靈闕之陰旨珍玉津之滌豈徒真定歸美大谷慙

欽定四庫全書

漢魏六朝百三大家集
卷七十七

十四

滋將恐帝臺妙崇安期靈康不得孤擅王盤獨甘仙席
雖秦君傳器漢后推食望古可儔於今何答

教

為錄公拜揚州恩教

昔召南分陝流甘棠之德平陽好道深獄市之寄吾忝
屬負荷任總侯伯受餞元戎作牧中甸此地五都雜會
四方是則而向隅之矜斯積納隍之歎猶繁興念下車
無忘待旦有齊禮導德致之仁壽弘漏網之寬申在宥

之澤

為東海餉諸葛處士教

昔長孫東組降龍丘之節文舉北輜高通德之稱所以
激貪立懦式揚風範處士諸葛璩高風所漸結轍前修
豈懷珠被褐韜玉待價將幽貞獨往不事王侯者耶聞
事親有啜菽之宴就養寡藜蒸之給豈得獨享萬鍾而
忘茲五秉可餉穀百斛

哀策文

欽定四庫全書

漢魏六朝百三大家集
卷七十七

十五

齊敬皇后哀策文

惟永泰元年秋九月朔日敬皇后梓宮啟自先塋將祔
于興安陵其日至尊親奉奠明皇帝乃使魚太尉陳顯
達設祖于行宮禮也翠帟舒阜玄堂啓扉俎徹三獻筵
卷六衣哀子嗣皇帝懷蜃衛而延首想鸞輅而撫心痛
椒塗之先廓哀長信之莫臨身隔兩赴時無二展旋詔
左言光敷聖善其辭曰

帝唐遠胄御龍遙緒在秦作劉在漢開楚肇惟淑聖克

柔克令清漢表靈曹沙膺慶爰定厥祥徽音允穆光華
治止榮曜中谷敬始絃綖教先種稷睿問川流神襟蘭
郁先德韜光君道方被于佐求賢在謁無訛顧史弘式
陳詩展義厚下曰仁藏往伊智十亂斯俟四教罔忒思
媚諸姑貽我嬪則化自公宮遠被南國軒曜懷光素舒
佇德閔予不祐慈訓早違方年冲藐懷袖靡依家臻寶
業身嗣昌暉壽宮寂遠清廟虛歸嗚呼哀哉帝遷明命
民神胥悅乾景外臨陰儀內缺空悲故劍徒嗟金穴璋
欽定四庫全書
漢魏六朝百三家集
卷七十七
其

哉
謚冊文
齊明皇帝謚冊文
維永泰元年九月朔日哀子嗣皇帝諱仰惟大行皇帝
早棄萬邦聖烈方遠式遵一作帝世俾邇鴻猷咸以為
無名以化則言繁莫宣其道有求斯應則影響庶圖其
功所以永言配命寄心宗極光昭令德允樹風聲伏惟
大行皇帝合信四時齊明日月創保大於登庸通神機
欽定四庫全書
漢魏六朝百三家集
卷七十七
十七
於受命因時以暢藉九萬而輕舉天保既定運四海而
高臨及迺開物成務重維國綱風行草化心往如神左
賢右戚內樂外禮輯五材以教民申三驅而在宥用能
盛德殷薦美善斯畢皇矣之業既孚蒸哉之道咸備景
化方遠厥世在天龜筮告期遠日無改仰則前王俯詢
百辟累德稱睿允極鴻名謹命某申奉太牢之奠謹上
尊謚曰明皇帝廟號高宗天人允協神其尚饗嗚呼哀
哉

墓銘

臨海公主墓銘

長發有祥瑤臺乃構元鳥歸飛北音斯奏聿來徐土禎
符爰授帝體靈柯穠華以秀飾館東魯言歸景族有教
公宮無繫車服既肅簪珥亦崇湯沐率禮衡門降情雲
屋彼月斯望在鈞維緡瞻須配景望燭齊神靈華崑岫
滅采上春慈纏雲陞悲動外姻鬱彼崇芒睠然城輦輜
翟按轡龍旒徐轉

欽定四庫全書

漢魏六朝百三家集
卷七十七

十八

新安長公主墓銘

氛氲長發時惟睿文誕茲明淑玉振蘭芬譽宣女師德
侔高行肅穆嬪風優游閭正撫事成箴臨圖作鏡如何
冥默方春委盛

海陵王昭文墓銘

中樞誕聖膺厯受命於穆二祖天臨海鏡顯允世宗溫
文著性三善有聲四國無競嗣德方衰時惟介第景祚
云及多難攸啓載驅軫輅高闕代邸庶辟欣欣威儀濟

濟亦既負宸言觀帝則正位恭已臨朝淵嘿虔思寶締
負荷非克敬順天人高遜明德西光已謝東旭又涼龍
燾夕儼葆挽晨鏘風搖草色日照松光春秋非我晚夜
何長

鬱林王墓銘

綠車旖旎翠綖掩映癸貳戲良臨桃弛盛毀德歸桐葉
尊居鄭

祭文

欽定四庫全書

漢魏六朝百三家集
卷七十七

十九

祭大雷何周二神文

大過在運小雅盡缺瓊鏡日淪金車未晰周生電斷神
謨英冠正因部奇風歛雲散晉德如燬功資叶贊山無
猛鷲時曠忠賢流王于彘龜鼎忽焉忠肅布衣君親自
然驅狐上國斬鯢中川紛綸凱入氛氲配天

為隨王東耕文

穀墜星景穡表蜡先八政奚首六府茲宣弊嗟非國登
頌有年一夫或怠望歲誰天

為諸姊祭阮夫人文

婉婉嬪德幽閑嬪性眇史弘箴陳詩陳詠嘉言足題清
暉可映契潤未幾音塵如昨中景遽傾芳木先落疇昔
交觴享也虛薦帶上先結握中遺扇迸淚失聲潺湲如
霰

樂府

齊雩祭歌八首

南齊書樂志曰建武二年雩祭明堂
謝朓造辭一依謝莊唯世祖四言也
漢魏六朝百三家集
卷七十七
三

欽定四庫全書

迎神 八章

清明暢禮樂新候龍景練貞辰
陽律亢陰晷伏耗下土薦種稔
宸儀警王度乾嗟雲漢望昊天
張盛樂奏雲儼集五精延帝祖
雩有諷崇有秩脣鬯芬圭瓚瑟
靈之來帝閣開車煜燿吹徘徊
停龍輶偏觀此凍雨飛祥雲靡

壇可臨奠可歆對眇社鑒皇心

祖世
武皇帝 三章

濬哲維祖長發其武帝出自震重光御寓七德攸宣九
疇咸叙靜難荆衡凝威蠡浦

昧旦丕承夕惕刑政化一車書德馨染盛昭星夜景非
雲曉慶衢室成陰璧水如鏡

禮充玉帛樂被匏絃於鑠在詠陟配於天自宮徂兆靡
愛牲牲我將我享永祚豐年

欽定四庫全書

漢魏六朝百三家集
卷七十七
三

青帝 三章

營翼日鳥殷宵凝冰泮元蟄昭
景陽陽風習習女夷歌東皇集
奠春酒秉青珪命田祖渥羣黎

赤帝 三章

惟此夏德德恢台兩龍在御炎精來
火景方中南譌秩靡草云黃含桃實
族雲翳鬱溫風扇興雨祁祁黍苗遍

黃帝 三章

稟火自高明毓金挺剛克涼燠資成化羣芳載厚德
陽季勾萌達災徂溽暑融商暮百工止歲極凌陰沖
泉流疏已清原隰甸已平咸言祚惟億敦民保齊京

白帝 三章

帝說于兄報矩固司藏百川收潦精景應金方
嘉樹維披揄闕命賓鳥夜月如霜金風方嫋嫋
商陰肅殺萬寶咸已道勞哉望歲場功冀可收

欽定四庫全書

漢魏六朝百三集
卷七十七

三

黑帝 三章

白日短玄夜深招搖轉移太陰霜鐘鳴冥陵起星迴天
月窮紀

聽嚴風來不息望玄雲黝無色曾冰烈積羽幽飛雪至

天山側

闕梁閉方不巡合國吹饗蜡賓統微陽究終始百禮洽
萬祚臻

送神 五章

敬如在禮將周神之駕不少留

躍龍鑣轉金蓋紛上馳雲之外

警七曜詔八神排闥闔渡天津

有滄興膚寸積雨冥冥又終夕

俾棲糧維萬箱皇情暢景命昌

隋王鼓吹曲十首 以下
五言

齊永明八年謝朓奉鎮西隋王敕於荊州道中作鈞天以上三曲頌帝功校獵以上三曲

頌德

欽定四庫全書

漢魏六朝百三集
卷七十七

三

元會曲

二儀啓昌厯三陽應慶期珪瓚紛成序鞞譯憬來思分
階葩組練充庭羅翠旗觴流白日下吹溢景雲滋天儀
穆藻殿萬寓壽皇基

郊祀曲

六宗禋配岳五峙奠甘泉整蹕遊九闕清簫開八埏
鏘鏘玉鑾動溶溶金障旋郊宮光已屬升柴禮既虔福響
靈之集南岳固斯年

鈞天曲

高宴顒天臺置酒迎風觀笙鏞禮百神鍾石動雲漢瑤
堂琴瑟驚綺席舞衣散威鳳來參差元鶴起凌亂已慶
明庭樂詎慙南風彈

入朝曲

江南佳麗地金陵帝王州逶迤帶綠水迢遞起朱樓飛
甍夾馳道垂楊蔭御溝凝笳翼高蓋疊鼓送華輶獻納
雲臺表功名良可收

欽定四庫全書

漢魏六朝百三家集

卷七十七

出藩曲

雲枝紫微內分組承明阿飛艎遡極浦旌節去關河渺
渺蒼山色沉沉寒水波鏡音已渝曲簫鼓盛唐歌夫君
邁惟德江漢仰清和

校獵曲

凝霜冬十月殺盛涼颼哀原澤曠千里騰騎紛往來平
置望煙合烈火從風迴殪獸華容浦張樂荆山臺虞人
昔有諭明明時戒哉

從戎曲

選旅辭輶軒弭節赴河源日起霜戈照風迴連騎翻紅
塵朝夜合黃沙萬里昏寥戾清笳轉蕭條邊馬煩自勉
輟耕願征役去何言

送遠曲

北梁辭歡宴南浦送佳人方衢控龍馬平路騁朱輪瓊
筵妙舞絕桂席羽觴陳白雲丘陵遠山川時未因一為
清吹激潺湲傷別中

欽定四庫全書

漢魏六朝百三家集

卷七十七

登山曲

天明開秀萼瀾光媚碧隄風盪飄鶯亂雲行芳樹低暮
春春服美遊駕凌丹梯升嶠既小魯登巒且悵齊王孫
尚遊衍蕙草正萋萋

泛水曲

玉露霑翠葉金風鳴素枝罷遊平樂苑泛鷁昆明池旌
旗散容裔簫管吹參差日晚厭遵渚採菱贈清漪百年
如流水寸心寧共知